

SEGUNDA CARTA DEL APOSTOL SAN PABLO A LOS CORINTIOS

1 ¹Wejr Pabluqui Jesucristuž illta apostoltčha. Yoozqui niž munañpi jaru tii apostol puestuquiz wejr utchičha. Jaziqui tii cartal apayžcučha ančhucaquin Corinto wajtchiz žoñinaca. Wejttan Timoteužtan ančhucaquin tsaanžcučha. Nižaza tjapa Acaya yokquin kamñi žoñinacžquin tsaanžcučha. Ančhucqui Yoozquin criichiž cjen Yooz icliz žoñinacžhucčha. ²Učhum Yooz Ejpžtan Jesucristo Jiliržtan ančhucaquiz yanapt'ila. Nižaza ančhucaquiz walikaj kamkatla.

YOOZ EJP ANCHA OKŽŇI NIŽAZA KUZŇI KUZIZ

³Učhum Jesucristo Jilirž Yooz Ejpžquiz honora waytitaj cjila. Yooz Ejpqui okžni kuzzizpančha, nižaza sufrita žoñinacžquiz zumpacha kuzñipancha. ⁴Wejrnacaž sufranam Yooz Ejpqui kuzñipancha, nizatpacha wejrnacaž sufrita jilanacžquiz kuzjapa. Nekztanaqui wejrnacqui sufrita jilanacžquiz maznasačha, “Yoozqui amquiz kuznasačha”, cjican. Nižaza wejrnacpacha ninacžquiz kuznasačha. ⁵Jesucristužquin criichiž cjen Jesucristuž irata ancha sufručha. Nižaza Jesucristučha wejrnacaquiz zumpacha kuzñiqui.

⁶Jaziqui wejrnacqui ančhucaquiz tsjan zuma kuznasačha. Nižaza Yooz taku paljaycan ančhucaltajapa sufručha, ančhuc liwriyta cjisjapa. Nižaza wejrnacqui Yooziž kuztačha. Jaziqui nižtazakaz ančhucaquiz kuznasačha. Nekztan ančhucqui kuzta kuzziz cjen sufrisnaca wataquičha, ana ančhuca kuz turwayskatžcu. Jaziqui ančhucqui wejrnac irata sufrican, pasinziz kuztan awantasačha. ⁷Ančhucqui tjurt'iñi kuzzizčhucčha. Jalla nužupančha ančhucqui. Ančhucqui wejrnac irata sufričha. Nižaza Yoozqui ančhucaquiz zakaz kuznaquičha. Jalla nužupanž cjequičha.

⁸Jilanaca, cullaquinaca, tii puntunaca ančhucaquiz zizkatz pecučha. Asia yokaran ojklaycan, ancha sufrichinčha. Jalla nuž sufrican azi upzižtakaz cjissintačha, ticzmayažtakaztačha. ⁹Jalla nižta sufritiqiztan kuzquiz tantiichinčha, ticzucapan, jalla nii. Pero Yoozza ticzinacami jacatatskatñiqui. Jalla nižta sufrichinčha, persun azquizimi nižaza pinsitanacquizimi ana kuzziz cjisjapa, antiz Yoozquin juc'anti kuzziz cjisjapa. ¹⁰Ultimquiziqui Yoozqui wejr liwrichičha, nii ticzmaya ojklayta pruebanacquiztan. Nižaza wila

nižta prueba tjonaquič niiqui wilta Yoozqui wejr liwriyaquiča. Yoozquin kuzziz cjican, jalla nužupanča wejt razunaqui. ¹¹ Ančhucqui wejtquiz mayizinalla, wejt pruebanacquiztan liwriita cjisjapa. Jalla nuž ančucaž ancha mayizintaž cjen liwriital cjeeča. Jalla nekztan weriž yanaptaž cjen anchucqui Yoozquin gracias cjican chiyasača. Jaziqui wejtajapa mayizinalla.

PABLO CORINTO WAJTQUIN OJKZ PECATČA

¹² Wejrqui ančhucatan, nižaza tjapa žoñinacžtanami Yooz zuma kamañchiz kamchinča, zuma lijituma. Ana pizc kuzziz kamchinča. Wejt kuzquiz zizuča anal toscara chiyuča, weraral chiyuča. Jalla nižta zuma kamcan, ana žoñiž pinsita jaru kamchinča. Okžni Yoozqui wejtquiz yanapchiča, nižta zuma kamzjapa. Jalla nižta zuma kamtaž cjen cuntintutča wejrqui. ¹³ Weriž cjiřtaqui zuma werara zakazza. Liican, ančhucqui kjanaž intintasača. Ana incallni kuztan cjiřžčuča. ¹⁴ Yekjapanacaqui ančucaquiztan wejt kuz pajča. Wejt kuzqui juc'anti zumpacha pajspanča ančhucqui. Nekztan Jesucristo Jiliriž tjonz tjuñquiziqui ančhucqui weriž cjen cuntintuž cjesača, jaknužt wejrqui ančucaž cjen cuntintul cjeeča, jalla nižta. ¹⁵ Ančhucatan wejtta walikazza. Jalla nužupanča. Jalla nižtiquiztan weriž ojklaytiquiz ančucaquin wilta tjonz pecaytuča. Nekztan ančhucqui pizc wilta cuntintu cjskattaž cjitasacha, weriž pizc wilta tjonžtiquiztan. ¹⁶ Primiraqui Macedonia cjita provinciquin ojkan ančucaquiz tjonz pecaytuča. Nekztan Macedoniquin ojkažu wilta ančucaquiz tjonz pecaytuča. Jalla

nuž ančhucqui wejr yanaptasača, Judea yokquin irantizjapa. Nužupan tantižcu ana atchinča. ¹⁷ Jalla nižtiquiztan yekjap žoñinacaqui wejtjapa chiichiča, Pabluqui p'ajpacužtakaz chiichiča, cjican. Anača werara ninacž tantiitaqui. Wejrqui ana tantiyiñča ana criichi žoñižtakaz. Ana criichi žoñinacaqui p'ajpawc razunchiz chiyasača. ¹⁸ Lijitum Yoozqui zizza, wejrqui anača p'ajpacužtakaz chiichintqui, nii ¹⁹ Silvanužtan, Timoteužtan, wejtta, jalla wejrnacqui anapan p'ajpawc razunanaca chiichintqui. Ančhucatan kamcan Jesucristo Yooz Majch puntuquiztan lijituma chiichinča. Nižaza Jesucristuqui zuma lijitumača. Niiž chiita taku cumpliñipanča. ²⁰ Nižaza tjapa Yooz taku cumpliñipanča. Jalla nižtiquiztan Jesucristuž cjen Yooz tawkquiztan “Nužoj cjila” cjiñča. Nuž cjican Yoozquin honora tjaauča. ²¹ Nižaza Yoozza wejtnacquizimi ančucaquizimi Jesucristužquin tjurt'ini kuzziz cjskatniqui. Nižaza Yoozza wejr utchiqui, niž apóstol cjisjapa. ²² Yoozqui nii tjeeziča, nižaza wejtnaca kuzquiz niž Espiritu Santo luzkatchiča. Jalla nižtiquiztan kjana tjeezatača, Yooz žoñinacača wejrnacqui, nii.

UJCHIZ ŽOÑI PERTUNTA

²³ Jilanaca, cullaquinaca, Corinto wajtquin tsjii tjonžni okitača. Pero ana tjonchinča, ančhuc ana ujzjapa. Jalla niiča ana wejr tjonni razunaqui. Yoozqui zizza, weraral cjiwča wejrqui. ²⁴ Ančhucqui Yooz mantuquiz žejlča, anaž wejt mantuquiz. Pero ančucaquiz chiižinačaj niiqui, yanapz pecuča, ultimu ančhuc juc'anti cuntintuž cjisjapa.

2 ¹Wejrqui tantiichinča, imazi ančhucaquin wilta tjonzn̄i. Wilta llaquiskatz anal pecatuča. ²Ančhucaquiz llaquiskatasaz̄ niiqui, anaž čhjulumi wejtquiz cuntintu cjiskatasacha. Ančhuccha wejtquiz cuntintu cjiskatñiqui. Jalla nižtiquiztan ančhucaquiz ana wilta llaquiskatz pecatuča. ³Jaziqui ančhucaquin tjonz cjenpacha tuqui cjiyržquichinča zumpacha ewjt'ican, ančhuc anawalinaca azquichjapa. Nekztan wejrqui ančhucaquin irantižcu, cuntintu cjeecha, ana llaquita. Ančhuccha wejtquiz cuntintu cjiskatñiqui, ¿ana jaa? Weriz cuntintu cjen ančhucqui zakaz cuntintuž cjesacha. Jalla nužupanž cjesacha. ⁴Tuqui cjiyržquican, ančhucajapa ancha kuzquiz sint'iskatchinča nizaza llaquisinča, kaazcama. Jalla nuž cjiyržquican anal ančhuc llaquiskatz pecatuča, antiz wejt zuma munaziñi kuz tjeez pecaytuča. Ančhucatan ancha munazuča. ⁵Nii ana wali kamñi žoñiqui ančhucaquiz ancha llaquiskatchiča. Wejtquiz zakaz llaquiskatchiča; pero ančhucaquiz juc'anti. Cunamit anaž tjapa ančhucaquiz llaquiskatchižlani, pero jila partipan ančhucaquiztan. ⁶Jila parti ančhucqui nii ana wali kamñi žoñi casticchinčhuccha, nižaza chjaawjkatchinčhuccha. Nužquizkaz cjila. ⁷Anziqui nižquiz pertunz waquiziča, nižaza nižquiz kuz waquiziča, nii žoñi ana juc'anti upa kuz cjisnajo. ⁸Jaziqui ančhucaquiz rocuča, nižquiz zuma munaziñi kuz wilta tjeezjapa. ⁹Tuqui tii puntuquiztan ančhucaquiz cjiyržquichinča, ančhuc zumpacha yanzjapa, tjapa weriž chiižinta cazzi, ana cazzi, jalla nii. ¹⁰Nii ujchiz žoñiqui ančhucaž pertuntažlaja, jalla niiqui weriž

pertuntazakazza. Cristuž yujcquiziqui pertunuča, ančhuc juc'ant zuma cjisjapa. ¹¹Nii ujchiz žoñi pertunta cjis waquiziča, Satanás diablu ana učhumnacaquiz atipskatzjapa. Diabluž ana wal mañanaca zizza uchumqui.

QUINTU ANCHA ZIZ PECCHIČHA PABLUQUI

¹²Troas watja irantichinča, Cristuž liwriiñi taku paljayzjapa. Nekztan Jesucristo Jiliriztajapa langznan, muzpa žoñinacaqui Yooz taku nonziča. ¹³Pero Tito cjita jilžtan ancha zalz pecaytuča, ančhuc quinto zizjapa. Jalla nižtiquiztan wejt kuzqui anatača cuza. Jalla nižtiquiztan Troas wajtchiz žoñinacžquiztan eccu, Macedonia yokquin ojkhinča. ¹⁴Nicju tjapa ančhucž quinto nonzinča, walikazza ančhucqui. Yoozquin ancha gracias cjican chiyuča. Yoozpanča anawalinacquiztan wejnaca atipskatchiqui. Nižaza tjapa kjutñi Yooz Ejpqui Cristuž puntuquiztan paljayta cjiskatcha wejnacaž cjen. Jaknužt tjapa kjutñi tsjii zuma ulura žkejtchaja, jalla nižta irata wejnacaž paljayta liwriiñi taku tjapa kjutñiž ojkeča. ¹⁵Wejrnacqui zuma inzinzuztakaz Yoozquiz cuntintu cjiskatuča, Cristuž puntu paljaycan. Liwriita žoñinacžquizimi ana liwriita žoñinacžquizimi Cristuž puntu paljayuča. ¹⁶Nii ana liwriita žoñinacaqui anapan catoktiquiztan juc'anti casticta cjequiča. Jalla nižtiquiztan weriž paljaytaqui ana wali chjonanchi žketñižtakazza ninacžtajapa. Pero nii liwriita žoñinacazti weriž paljayta catoktiquiztan juc'ant zumaž cjequiča. Jalla nižtiquiztan weriž paljaytaqui zuma uluražtakazza ninacžtajapa. Jalla nižtiquiztan jequit

Cristuž puntuquiztan paljayñi puesto tanznasajo?

YOOZ UCHTA ŽONIČHA PABLUQUI

¹⁷Wejrqui Cristuž puntu paljaycan anal negocio paa-uča; nižaza Yooz taku anal queručha yekjap žoñinacažtakaz. Wejrzi zuma litituma paljajuča zuma kuzziz. Yooz uchta apostultča. Cristužtan wejtta tsjii kuzziz cjen, Yooz Ejpqui zizza, liwriiñi Yooz taku litituma paljajuča.

3 ¹Jalla nuž wejt puntuquiztan chiyanaqui, ančhucqui pinsačhani, wejr persunpacha honora waytiñi, jalla nii. Yekjapanacauqui tsjii carta nombramientužtan ojklajča. Nižta carta nombramientuqui wejtta ana pecza, ančhucquiz prisintizjapa. Nižaza ančhucquiztan nižta carta anal mayasača. ²Ančhucpachača wejt carta nombramiento cuntaqui. Ančhucqui weriž paljaytiquiztan ew kamañchizza. Tjapa žoñinacauqui nii cherasača, nižaza pajasača. ³Cristuqui ančhucquiz ew kamañchiz cjiskatča, weriž paljajtaž cjen. Jaziqui ančuca ew kamañauqui tsjii carta nombramientužtakazza. Jalla nii cartauqui anača čjul tintižtanami cijjrtaqui; anača čjul mazquizimi cijjrtaqui. Yooz Espiritu Santuqui ančuca kuzquiz luziča, ew kamañchiz cjisjapa. Jaziqui ančuca ew kamañauqui tsjii carta nombramientužtakazza.

CRISTUŽ LIWRIIÑI TAKU PALJAYZ

⁴Ančhucča kjana tjeezñiqui, wejrqui lititum apostoltqui, nii. Jalla nužupan cjiwča. Cristuž cjen nuž chiyasača Yooz yujquiz. ⁵Nuž cjican, zakaz cjiwča: Wejrpacha ana čjul walimi paasača Yooztajapa. Čjul Yooztajapa wali paatami Yooz

aztanpankaz paatača. Inakaztča wejrqui. Pero Yoozqui wejr illziča, niž apóstol cjisjapa. ⁶Yoozpacha wejr utčiča niž ew compromis puntu paljayñi ojklajzjapa. Nii ew compromisuqui anača Moisés cijjrta liiquiztan, antiz Espiritu Santužquiztanča. Nii cijjrta lii cjen žoñinaca infiernuquin okaquiča, castictaž cjisjapa. Espiritu Santuž cjen žoñinacauqui arajpachquin okaquiča, Yooztan wiñaya kamzjapa.

⁷Nii Moises cijjrta liiqui maznacquiz litranacžtan cijjrtatača. Nii cijjrta lii tanžcu, Moises yujcqui walja c'ajčiča. Jalla nuž Moises yujc walja c'ajan, parti Israel žoñinacauqui niž yujc ana cheržñi atčiča. Moises yujcqui jalla nuž c'ajñiž cjen, zumat zumat upa c'ajčiča. Yoozqui jalla nižta lii tjaachiča, honorchiz cjisjapa, žoñinaca ana liwriiñi cjenami. ⁸Yoozqui niž ew compromiso juc'ant honorchiz cjiskatchiča. Ew compromisquiztan Espiritu Santuqui žoñinacžquiz liwriiskatča. ⁹Nii honorchiz lii ana cumplitiquiztan učumqui castictajapa cjissinčhumča. Pero ew compromiso catokchiž cjen učumqui Yooz yujcquiz zuma cjissinčhumča, ana ujchiz. Juc'ant honorchizza nii ew compromisuqui. ¹⁰Tuquiqui Moisés liiqui honorchiztača. Anzta ew compromisquiztan nii tuquita liiqui ancha upa honorchizza, nii anzta compromisuqui juc'ant honorchiz cjen. ¹¹Nii liiqui Cristuž tjonzcama mantizjapakaz tjaatatača. Nekztan ana iya walča. Nii ew compromisuzti wiñayaž tjuraquiča. Jalla nižtiquiztan juc'ant honorchiz željztanča.

¹²Jalla nii ew compromiso ut'aytaž cjen wejrnacqui uchtača, wiñaya liwriiñi taku paljayzjapa. Jalla

nižtiquiztan tjup kuztan kjanacama chiyučha. ¹³Nii Moises irata anal paa-učha wejrnacqui. Moisesqui niiž c'ajni yujc chjojzičha, parti Israel žoñinaca ana cherzjapa, nii yujc c'ajni katzcama. Moises yujcqui ana tira c'ajničha. Nii tuž cjičha, liiqui anaž tira walčha, apatatta, jalla nii. ¹⁴Wejrnacqui liwriiñi puntuquiztan kjanacama chiyučha. Pero Israel žoñinacazti nii puntu ana intintazzičha. Chojru kuzzizpantačha anzcama ana intintazza. Moises lii liižcu nii liiquizkaz pinsičha. Cristužquin kuz tjaaž ana pinsičha. Pero Cristužquin kuz tjaachiž cjenkaz liwriiñi Yooz puntu intintazni cjesačha. ¹⁵Anzcama Moises lii liicanami ana liwriiñi Yooz puntu intintazasačha jila parti judío žoñinacacqui. ¹⁶Jesucristo Jiliržquiz kuz tjaažcu, nekztanž liwriiñi Yooz puntu intintazasačha. ¹⁷Jesucristo Jiliriqui Yooz Espiritužtan tsjii kuzzizza. Nižaza jakziltiž kuzquiz Jesucristuž Espiritu žejlčhaja, jalla niiqui liwriitapanž cjequičha. ¹⁸Jalla nižtiquiztan liwriitaž cjen, tjapa učhumqui Jesucristo Jilirž honoraž tjeēja, tsjii ispijužtakaz. Nižaza učhumqui zumat zumat Jesucristuž irata juc'ant zuma cjišsa. Nižaza niiž irata juc'ant juc'ant honorchiz cjišsa. Jalla nuž učhumnacaltajapa cjiskatčha Jesucristo Jilirž Espirituqui. Nužupančha Yoozqui učhumnacaltajapa.

YOOZQUI PABLO UTCHIČHA APOSTOL PUESTUQUIZ

4 ¹Jalla nižtiquiztan anal upa kuzziz cjesačha. Yoozqui niiž okžni kuzziz cjen wejr apostol puestuquiz utčičha. ²Jalla nii puestuquiz kamcan, wejrqui ana wali chjojzaka paaznaca, nižaza azzuca paaznaca ana wirapan paachinčha.

Nižaza ana wali paaz mañanaca ana wira paachinčha. Nižaza Yooz taku anal tsjii kjutni cjiyasačha. Antiz kjanacama werarapanikal chiyučha. Yoozza weriž chiitaqui zizniqui. Nižaza weriž chiitiquiztan tjapa žoñinacacqui persun kuzquiz zizasaccha, wejrtčha ligitum apostoltqui, jalla nii. Nuž cjiwčha, ana wali žoñinacaz wejtquiz uj tjojtнанami. ³Weriž paljaytaqui zumzu takužtakazza ana criichi žoñinacžjapaqui. Ninacačha infiernuquin ojkninacacqui. ⁴Tii muntuquiz mantiñi diabluiqui nii ana criichi žoñinacž kuz chojru cjiskatchičha, liwriiñi taku ana intintajo. Zur žoñižtakaz cjiskatchičha, Cristuž liwriiñi kjana ana cherajo, nižaza liwriiñi taku ana catokajo. Nii liwriiñi takučha ancha zumaqui. Ancha zuma Cristuž puntu chiičha. Jesucristučha Yooz Ejpž kuz tjeežniqui. ⁵Jilanaca, cullaquinaca, nonžna. Wejrqui Jesucristuž puntuquiztankaz paljayučha. Ultim chawjc Jiliripankazza Jesucristuqui. Nuž cjiwčha. Jesucristuž honora waytučha; anačha wejt persun honora waytučha. Nižaza Jesucristuž mantuquiz ojklaycan wejrqui ančhuca piyunitčha, ančhuc yanapzjapa. ⁶Tuquitanpacha Yoozqui mantichičha ween zumchiquiz kjana cjejajo. Nii Yoozpachačha wejt kuzquiz kjanchiqui, liwriiñi Yooz taku zumpacha intintizjapa, ancha zuma Yoozpan pajzjapa. Jesucristuqui niiž ancha zuma kamañchiz cjen Yooz kuzmi nižaza Yooz honora tjeezičha, učhum nii zuma intintajo.

PABLUQUI ANCHA SUFRICHIČHA

⁷Jaknužt zumanaca tsjii ljoc mazquiquiz chjojta cječhaja, jalla nižta irataž Yoozqui liwriiñi puntu wejtquiz cumpjiichičha žoñinacžquiz

paljayajo. Jalla nuž Yoozqui wejr apóstol utchiča, niž juc'ant zuma azi tjeezjapa. Liwriiñi aziqi Yoozquiztankaz tjonča, anaž wejtquiztan tjonča. Žoñikazza wejrqui. ⁸Wejtta ancha anawalinaca želanami, ultimquiziqui wejrqui atipača. Wejt kuz turwayskatanami, anaž wejt kuz llajllasa. ⁹Žoñinacaž wejr chjatkatanami, Yoozqui wejr ana zinalla ecča. Wejtquiz ancha sufriskatanami, žoñinacaqui wejr anaž akasača. ¹⁰⁻¹¹Jesucristužquin sirwican jakziquinami wejr ojklayučhaja, ancha sufruča, ticzmaya cjenami. Jalla nuž sufrican, Jesucristuž cjen tira žetuča; nižtajapa tii curpuquiz kamuča. Jesucristužquin sirwichiž cjen ancha sufruča. “Waj ticznaa; ticznaa” cjiwča. Pero tii ticzñi curpchiz žejtcanaqui, Jesucristuž cjen kamuča. ¹²Wejrqui walja sufrisnawal watuča. Wilta wilta ticzmayažtakaztača, Cristuž puntu paljaycan. Pero weriž paljaytiquiztan ančhucqui Cristuž žeti tanchinčhucča.

¹³Yooz takuqui tuž cjiča: “Yoozquin kuzziz cjen, wejrqui chiyuča”. Jalla nižta irata wejrqui Yoozquin kuzzizza, sufrita kamcanami. Jalla nižta kuzziz cjen, chiichiyuča, Cristuž puntu paljaycan. ¹⁴Nuž paljayuča, tuž zizcu: Yoozqui Jesucristo Jiliri jacatatskatchiča, nižaza Jesucristužtan chica wejrmi ančhucmi jacatatskatta cjequiča. Yooz yujcquin chjichtaž cjequiča. Čhjulumi sufrican, nii cjuñznuča. ¹⁵Tjapa wejtquiz watchinacaqui ančhucaltajapača. Liwriiñi Yooz taku paljayuča, juc'anti juc'anti žoñinaca Yoozquin kuzziz cjiskatzjapa, nižaza ninaca Yooziž yanapta cjiskatzjapa. Jalla nuž cjen tsjan tsjan žoñinacaqui Yoozquin gracias cjican chiyaquiča, nižaza Yoozqui juc'anti honorchiz cjequiča. Jalla nuž pecuča.

¹⁶Jalla nižtiquiztan wejrqui anal llajllazuča. Kjažtami wejt curpu sufrichani wejt kuz zapuru tsjan tjupi cjissa; juc'anti Yoozquin kuzziztča. ¹⁷Tii wirquiz kamcan sufrisqui tsjii ratužtakazza; nekztan watča. Pero tii muntuquiz sufritiquiztan učhumqui arajpachquin wiñaya honorchiz cjequiča. Ancha sufriču, ancha juc'anti honorchiz cjequiča. Arajpachquin ancha zuma kamaquiča. ¹⁸Nužupanž cjequiča, tii muntuquiz žejlñi cusasanacžquiz anača kuz tjaažqui. Antiz arajpach zumanacžquin kuz tjaaž waquiziča. Nekztan arajpachquin ancha honorchiz cjequiča. Cherta cusasanaca wataquiča. Arajpach zumanacazti wiñaya tjuraquiča.

PABLUQUI ARAJPACHQUIN OJKZ PECČA

5 ¹Jalla tuž zizuča wejrqui. Tii žejtñi curpuqui ticziž cjequiž niiqui, Yoozqui ew curpuž tjaaquiča, Yooz paata curpu. Nekztan arajpachquin wiñaya kamača. ²Tii muntuquiz sufricanaqui anchal pasnuča ayincan. Ew arajpach curpu anchal pecuča, nekz kamzjapa. ³Wejt kuzqui nii ew curpuchiz ancha pecča, tsjii ew zquiti cujtz pecas, jalla nižta. Ana curpuchiz anal cjis pecuča. ⁴Tii curpuchiz sufrican, aynuča. Tii curpuqui ticznaquiča. Nižaza tii muntuquiz kamtaqui ana wiñayjapača. Jalla nižtiquiztan ew yekja curpuchiz cjis pecuča. Arajpachquin wiñayjapa kamz pecuča. ⁵Yoozpachača nižtajapa wejr utchiča. Nižaza Yoozza niž Espiritu Santo wejt kuzquiz luzkatchiqui. Jaziqui arajpachquin kamspanča wejrqui.

⁶Jalla nižtiquiztan wejrqui tjup kuzzizpanča. Tii curpuchiz kamcan,

arajpachquin Yooztan chica ima žejlča. Pero arajpach wajtchiz žoñtča wejrqui. Jalla niil zizuča. ⁷Tii muntuquiz kamcan, ana Yooz chercan kamuča. Pero ana cherta Yoozquin kuzzizpan kamuča ana niiz cheranami. ⁸Jalla nižtiquiztan tjup kuzziz želuča. Tii curpuquiztan ulanžcu, nižaza Yooztan chica arajpachquin kamcan, jalla nii walikaz cjesača. ⁹Jaziqui žejtcanami, ticz cjenami, Yoozquin kuzziztča wejrqui. Weriz kamtiquiztan wejt Yoozquiz cuntintu cjiskatzpan pecuča. ¹⁰Tjapa učhumnacqui Cristuž yujcquiz prisintistanča, pjalžta cjisjapa. Jaknužt tii muntuquiz kamtčhaja, zuma ana zuma, jalla niit jama pjalžtaž cjequiča. Jalla nuž pjalžtiquiztan zapa maynižquiz arajpach kamaña tjaataž cjequiča.

ŽOÑINACŽTAN YOOZTAN WALIKAZ CJESAČA

¹¹Jalla nižtiquiztan Jesucristo Jiliri eksan zuma razunžtan ančhucaquiz chiyuča, zuma kamanchiz kamiñča, cjican. Toscara anal chiyuča. Wejt kamaña Yooz zizza. Wejr cjiwča, ančhucqui zakaz zizza zuma kamañchiz kamiñča, jalla nii. ¹²Jalla nuž chiican, persun honora anal waytiz pecuča. Antiz wejt puntuquiztan ančhucaquiz intintiskatz pecuča, wejtquiztan cuntintu cjisjapa. Jalla nekztanaqui ančhucqui wejt quintra žoñinacžquiz kjaaznasača, zuma razuna tjaacan, “Pabluqui zuma kamñiča”, cjican. Wejt quintra žoñinacaqui žoñinacžquiztan honorchiz cjis pecča. Ninacžtajapa zuma kuz anaž importayča. Tucquin cjis, jalla niikaz importayča ninacžtaqui. ¹³Wejrzi zuma kuzziz cjis anchal

pecuča. Wejt quintra žoñinacaqui cjiñiča “Lucuratača Pabluqui”. Jalla nuž chiyanami Yooztajapakal kamuča. Yekjap žoñinacazti cjiñiča, “Zuma razunžtan chiiča Pabluqui”. Ančhucaltajapa zuma razunžtan chiyuča. ¹⁴Jesucristuqui ancha okzñi kuzziz cjen tjapa žoñinacž laycu ticziča. Žoñinacž cuntiquiztan ticziča. Jalla nužupanča weraraqui. Jalla nuž tjapa kuztan crižcu, wejrqui Jesucristužquin sirwistanča, liwriiñi taku paljaycan. ¹⁵Jesucristuqui tjapa žoñinacž laycu ticziča, žoñinacž ana persunjapa kamajo, antiz Cristužtajapa kamajo. Jalla nižtiquiztan jakziltat ew kamañchiz kamčhaja, jalla ninacaqui Jesucristužtajapa kamz waquiziča. Jesucristuča ninacž laycu ticziqui, nižaza jacatatchiqui. ¹⁶Jaziqui Jesucristužtajapa kamcan, zizuča, žoñinacž kuzza chekanaqui, nii. Tuquiqui pinsatuča: Žoñinacž cherchi, pajk puesto ocupchi, wajt honora tanchi, jalla nižtanacača chekanaqui, nuž cjican pinsatuča, Cristuž puntuquiztanami. Ana criichi žoñinacž pinsitakaz pinsatuča. Anziqui ana iya nižta pinsuča. ¹⁷Jaziqui tuž cjiwča: jakziltat Cristužtan tsjii kuzziz cjissaja, jalla niiqui ew kuzzizza, nižaza ew kamañchizza. Tuqita kamaña liwj ecta, ew kamañchizpan kamča. ¹⁸Ew kuzmi nižaza ew kamañami Yooziž tjaatapanča. Cristuž cjen Yoozqui učhumnaca pertunchiča, nižtan učhumnacatan zuma cjisjapa. Nižaza Yoozqui wejnaca utchiča parti žoñinacžquiz Yooz pertunz puntu paljayajo, Cristuž cjen žoñinacžtan Yooztan zuma cjesača, cjican. ¹⁹Yooz pertunz puntuqui jalla tužuča. Yoozqui Cristuž cjen tjapa žoñinaca pertunasača, nižtan ninacžtan zuma cjisjapa. Žoñinaca pertunžcu,

ana ujchiz cjiskatĉha, ana casticta cjsjapa. Niżaza Yoozqui wejnacaquiz cumpjiichiĉha, Yooz pertunz puntu paljayajo. ²⁰ Jalla niżtiquiztan Cristuż cuntiquiztan ojklayuĉha niż takunaca paljaycan. Jalla nuż ojklayan Yoozqui weriż cjen anĉucaquiz paljayĉha. Jaziqui Cristużtajapa anĉucaquiz chiiżinuĉha, Yoozquin kuz tjaalla, niżtan anĉucatan zuma cjsjapa. Jalla nuż chiiżinuĉha. ²¹ Cristuqui ana ĉjul uj paachiĉha. Uĉum laycu Jesucristuqui Yooz yujcquiz uĉum ujnacchiz cjissiĉha, uĉumqui Yooz yujcquiz ana ujchiz niżaza zuma cjsjapa. Jalla nuż cjiskatchiĉha Yoozqui, niż pinsitacama.

6 ¹ Jilanaca, cullaquinaca, wejrqui Yooztan langznuĉha, Źoĉinaca Yoozquin kuz tjaajo. Jaziqui anĉucaquiz chiiżinuĉha, liwriiĉi Yooz takuqui anaĉha inapankaz nonzqui, nii. Ancha okżni kuzziz cjen, Yoozqui anĉucaquiz niż liwriiĉi taku paljaykatchiĉha. ² Cjijrta Yooz takuqui tuż cjiĉha: “Wejrtĉha okżniĉtqui, anĉhuc liwriita cjsjapa. Jaziqui tii timpuquiz okżni kuzziz anĉucaż mayizita nonzinĉha, niżaza tii liwriiz timpuquiz anĉucaquiz yanapchinĉha”. Jaziqui Yoozpanĉha okżni kuzzizqui. Anziqui Źoĉinaca liwriita cjesaĉha.

³ Wejrqui anal jec Źoñżquizimi t'ezinz pecuĉha, ujquiz tjojtjapa. Jaziqui ana jecmi weriż Yooztajapa trabajta iñarasaĉha. ⁴ Yooztajapa trabajcan, jaknuż watanami, zuma Yooz kamañakaz tjeez pecuĉha. Yoozquin tjurt'iĉi kuz tjeez pecuĉha, ĉjul sufrisquiztanami, niżaza ĉjulquiztan t'akjiri Źejlżquiztanami, niżaza ĉjul ch'ama ojklayquiztanami. Ćjulunacaż watanami tjurt'iĉi kuz tjeez pecuĉha. ⁵ Jilanaca, cullaquinaca, tiżta sufrisnaca watchinĉha:

wajjtataĉha, carsilquiz chawctataĉha; Źoĉinacaqui wejnaca quintr aptichiĉha; niżaza muzpa ch'ama langznaca watchinĉha otchañ tjepi; niżaza ana tjaĉhi kamchinĉha, niżaza ĉherż kjara pascan Źejlchinĉha. Jalla niżta sufrisnaca watchinĉha, tjurt'iĉi kuztan. ⁶ Yooztajapa langzcan, zuma Yooz kamaña tjeez pecuĉha, zuma lijitum Yooz kamañchiz kamcan, niżaza Yooz puntu zuma zizni niżaza pasinziz kuzziz kamcan, niżaza okżni kuzziz kamcan, niżaza Espiritu Santuż aztan kamcan, niżaza zuma lijitum munaziĉi kuzziz kamcan, ⁷ niżaza lijitum Yooz taku paljaycan, niżaza Yooz aztan kamcan. Jalla niżta kamcan zuma Yooz kamaña tjeez pecuĉha. Niżaza Yooztajapa kamcan, Yooz zuma razunżtan ojklayuĉha, tsjii zuma armichiztakaz. Yooz zuma razuna chiican, wejrqui Źoĉinacżquiz Yooz taku catokskatuĉha, niżaza quintr Źoĉinacżquiz Yooz zuma razunżtan kjaaznuĉha. ⁸ Yooztajapa kamcan, awizaqui wejrqui zuma rispittaĉha. Awizaqui ch'aanitazakazza. Awizaqui Źoĉinacaqui wejt quintr ana waliz parliĉha. Awizaqui Źoĉinacaqui wejt puntu zumaż parliĉha. Wejt puntuquiztan yekjap Źoĉinacaqui “Niĉha tsjii kjutni irpiĉi” cjian chiichiĉha. Jalla nuż cjenami, wejrtĉha werara chiiĉtqui, niżaza irpiĉtqui. ⁹ Yekjapanacaqui wejr ana pajz pecĉha. Jalla nuż cjenami, pajtapanikazza wejrqui. Yekjapanacaqui “Nii Pabluqui ticzla”, cjiĉiĉha. Jalla nuż cjenami tiral Źetuĉha. Wejt Yooz Epiż ujżta cjenami, ana contaĉha wejrqui. ¹⁰ Llaquita kuzziz cjenami, Yoozqui wejt kuzquiz cuntintupan cjiskatĉha. Poriz cjenami, Yooz taku paljaycan walja Źoĉinacżquiz ricachużtakaz cjiskatchinĉha. Ana ĉjulchiz cjenami, tjapa wejtta Źejlĉha,

Yooz maatiž cjen. ¹¹Corinto wajtchiz jilanaca, cullaquinaca, kjanapacha ančhucaquiz paljayžcuča. Ančhucatan zuma munazuča, tjapa kuztan.

¹²Anača juntuñaalla kuz ančhucatan munazuča. Yekjapanacazti anaž tjapa kuztan wejttan munaziz pecčhani.

¹³Pero ančhuczi tjapa kuztan wejttan zuma munaziñi cjee. Ančhucaquiz chiižinuča, jaknužt tsjii ejp persun ocjalžquiz chiižinčhaja, jalla niža.

YOOZ ŽOÑINACČHUCČHA ANČHUCQUI

¹⁴Tsjilla chiižinuča. Ana criichi žoñžnacžtan anaž ancha pajasa, tii muntuquiz kamcan. Yooz kamañchiz žoñiqui Yooz quintra žoñžtan anapan tsjii kuzziz cjesača. Zuma žoñiqui ana zum žoñžtan anapan zuma pajasasača, tii muntuquiz kamcan. ¹⁵Jaknužt Cristužtan Satanas diablužtan tsjii kuzzizpan cjesajo? Nižaza jaknužt criichi žoñiqui ana criichi žoñžtan tsjii kuzziz cjesajo? Anapanž tsjii kuzziz cjesača. ¹⁶Yooz kjuyquiz žoñiž paata yooznacaqui anapanžuntu cjesača. Nižaza učumqui žejtñi Yooz kjuyčumča. Yoozpachača tuž cjichiqui: Ninacž kuznacquiz kamača; ninacžtan chica želača. Ninacž Yooz wejr cjeecha, nižaza ninacaqui wejt wajtchiz žoñinacaž cjequiča. ¹⁷Jalla nižtiquiztan Yooz Jiliriqui tuž zakaz cjicha: Ana criichi žoñinacž kamañquiztan zaraka, nižaza jayta. Ana zum kamañanacchiz anapan kama. Nekztan wejrqui ančhuc zuma risiwača. ¹⁸Ančuca ejp cjeeča. Nižaza ančhucqui wejt maatinacaž cjequiča. Jalla nuž cjiča tjapa azziz Yooz Jiliriqui.

7 ¹Munazita jilanaca, cullaquinaca. Yoozqui učumnacaquiz niž chiiita takunaca tjaachiča. Jalla

nižtiquiztan učumqui tjapaman ana walinacquiztanami nižaza tjapaman ana zum kamañanacquiztanami jaytistanča, zuma kamañchizpan cjisjapa, curpumi kuzmi zuma cjisjapa. Yoozquin ekscan, nižaza rispitcan, tjapa ana walinacquiztan jaytistanča, juc'ant juc'ant walja zuma lilituma cjisjapa, Yooz kamañchizpan cjisjapa.

PABLUŽ CHIITA TAKU CATOKTA

²Wejttan zuma munaziñi cjee, tjapa kuztan. Ana jakziltiž quintra čhjulumi paachinča. Nižaza ana jakziltižquizimi tsjii kjutñi chjitchinča.

Nižaza ana jakziltižquizimi incallchinča, cusasanaca tanzjapa.

³Jalla nuž chiican, ančhucaquiz uj tjojtunz ana pecuča. Tjapa kuztan ančhucatan zuma munazuča. Tuqui nuž cjetuča. Anača wejr ančuca quintraqui. Ticz cjenami, žejtz cjenami tirapan ančhucatan zuma munazuča.

⁴Wejr cjiwča, ančhucqui tirapan Yoozquin tjurt'iñi kuzziz cjequiča. Ančucaž cjen ancha cuntintutča. Ančuca honora waytuča. Ančuca quinto nonžcu zuma kuztaž wejrqui. Ancha sufrita cjenami anchal chipuča ančucaž cjen.

⁵Macedonia yokquin irantižcu, ana jeejžñi atchinča. Tjapa kjutñi walja sufrisnaca želatča. Tjapa kjuttan quintranaca želatča. Wejt kuzqui turwaysnatča, “Criichi žoñinacaqui quejpsnaa”, cjichinča. Llaquita kuzziztača wejrqui.

⁶Pero Yoozqui llaquita žoñinacžquiz kuzñipanča. Yoozqui wejr kuzziča, Tituž tjontiquiztan.

⁷Nižaza Titžquiztan ančuca quinto nonžcu, wejrqui zuma kuztatača. Tituqui ančucaž cjen llaquita cjissitača. Nekztan ančucaquiz tjonžcu, nižaza ančucaž zuma kamta cheržcu, kuztatača. Nižaza

Tituqui quint'ichiċha, anċhucqui wejr ancha cherz pecatċha, niċaza weriċ llaquita cjen anċhucqui llaquitazakaz cjissinċhucċha. Nekztan wejtquiz tjurt'iċinċinċhucċha. Jalla nii nonċzu juc'anti cuntintu cjissinċha. ⁸Weriċ cjiċrta cartauki anċhuc llaquita cjiskatchiċha. Jalla nuċ cjenami, anziċui ana llactazzinċha. Pero tuċiqui llactazzinċha; nii anċhucaquiz chiċizinta ana cjiċrz pecatuċha. Pero anċhuc tsji upacamakaz llaquiskatchinċha. ⁹Anċhucqui llaquiskattiquiztan anazuma kamznaca ecchinċhucċha. Jalla niċtiquiztan wejrqui cuntintuċha. Anċhucaċ llactaztiquiztan wejrqui anataċha cuntintu. Antiz anċhucaċ anazuma kamznaca ectiquiztan jalla nekztantaċha wejrqui cuntintu. Anċhucaċ anazuma kamtiquiztan Yoozqui anċhucaquiz uj cjuċkatchiċha. Jaziċui weriċ cjen anċhucqui ana ina llaquissinċhucċha. ¹⁰Yoozqui ŋoċċquiz uj cjuċkatċha kuz campiita cjeċajo. Jequit kuz campiċhaja, jalla niiqui liwriita cjesaċha, zuma kamaċhiz cjisjapa. Niċaza liwriita ŋoċinacaqui cuntintuċha. Ana criichi ŋoċinacaqui ujnaca cjuċċzan niċaza llactazcan ana kuz campiyaquċz niiqui chojru kuzziz cjissa. Ultimu infiernuquin okaquiċha. ¹¹Anċhuczi uj cjuċċzu Yoozquin juc'anti kuzziz cjissinċhucċha; oralla kuz campiichinċhucċha. Niċaza tjapa kuz tjaaċhinċhucċha ana wali kamznaca azquichjapa. Nii uj paaċi ŋoċċ quintrā ancha ŋawjchinċhucċha. Niċaza nii ujquiztan tsucchinċhucċha. Niċaza wejtta ancha zalz pecchinċhucċha. Niċaza nii uj paaċi ŋoċi ancha castic pecchinċhucċha. Niċaza ultimu nii uj paaċi ŋoċi casticchinċhucpanċha. Jalla niċtiquiztan anċhucqui

kjanapacha tjeezinċhucpanċha, zuma kuzzizċhucċha, ana tira ujchiz. ¹²Nii uj paata puntuquiztan nonċzu anċhucaquiz c'aripacha cjiċrzquichinċha. Anataċha nii uj paaċi ŋoċċjapakaz cjiċrzquichinċui. Niċaza anataċha nii quintrā uj paaċinta ŋoċċjapakaz cjiċrzquichinċui. Antiz anċhucajapazakaz cjiċrzquichinċha, Yooz yujcquiz anċhucaquiz tjeezjapa, anċhucqui wejtta munaziċi kuzzizza, jalla nii. ¹³Ultimquiziqui tjappacha walikaz cjissiċha. Jalla niċtiquiztan wejrqui cuntintu cjissinċha. Anċhucaċ wilta zuma kamtiquiztan Tituqui wilta llan kuzziz cjissiċha. Niċaza Tito cuntintu cjissiċ cjen, wejr zakaz juc'ant cuntintu cjissinċha. ¹⁴Wejrqui Titċquiz anċhuca honora waytichinċha, "Ninacaqui zumaċha", cjican. Jalla nuċ cjican ultimquiziqui anċhucaċ cjen ana azkatchinċha. Anċhucatan ŋejlcan werar razunakaz chiichinċha. Niċaza Titċquiz chiita razuna werara zakazza anċhuca puntuquiztan. ¹⁵Tituċz tjaaċintacama zuma kamchinċhucċha. Niċaza Tito zuma risiwchinċhucċha, humilde kuztan, niċaza rispiti kuztan. Tjapa niċta cjuċċzu Tituqui anċhucaquin juc'antiċ munaziċha. ¹⁶Anċhucaċ cjen wejrqui zakaz ancha cuntintuċha. Niċaza anċhuca puntuquiztan cjiwċha, ancha zuma kamaċhiz, jalla nii.

OFRENDANACA TJAAZ PUNTU

8 ¹Jaziċui jilanaca, cullaquinaca anċhucaquiz tii zizkatz pecuċha, jaknuċt Macedonia yokquiz ŋejlċi criichinacaqui Yooz zuma kamaċa tjeeziċha, jalla nii. ²Nii criichi ŋoċinacaqui ancha pruebanaca watchiċha. Ancha pori cjissiċ cjenami ninacaqui ancha cuntintu ŋelatċha. Niċaza ricachuċtakaz

walja ofrendanaca utchiċha. ³Ninacž želinchizquiztan jama utchiċha. Wejr cjiwċha, jilacama utchiċha ninacž persun kuzquiztan. ⁴Ninacaqui t'akjir criichinacžquin ofrenda tjaaz ancha pecchiċha, jaknužt parti criichinacaqui ofrenda tjaatċhaja, jalla nižtapacha. Nižaza wejtquiz ancha rocchiċha fava paajo, ninacž ofrenda ċhijahajo, jalla nii rocchiċha. ⁵Ninacaqui juc'ant zuma paachiċha weriž tantiitiquiztanaqui. Tuquiqui Yoozquin tjapa kuz tjaachiċha. Nekztan Yooz munaŋpi jaru wejtquiz kuz tjaachizakazza. ⁶Jalla nižtiquiztan wejrqui Tito rocchinċha, anċhucaquin wilta okajo. Tuquiqui Tituqui ofrenda tjaaz puntu anċhucaquiz ċhižinċhiċha. Jaziqui Tito wilta rocchinċha, anċhucaquin wilta okajo, anċhuca ofrendanaca cumpliskatzjapa, jaknužt tuqui anċhucqui okžni kuzquiztan tjaatċhaja, jalla nuž. ⁷Anċhucqui ancha zumaċha; anċhucċha Yoozquin kuzzizpan, nižaza Yooz puntu zuma zizni, nižaza zuma tjaajnasacċha, nižaza tjapa kuztan zumanaca paayinċhucċha, nižaza wejtta zuma munaziŋi kuzzizċhucċha. Ćhjulquizimi anċhucqui ancha zumaċha. Jalla nižtiquiztan anċhucqui zuma ofrenda tjaaz zakaz waquizicha, anċhuca okžni kuzquiztan. ⁸Anċhucaquiz anal mantuċha, pero zizkatz pecuċha, parti žoninacaqui tjapa kuztan ofrenda utchiċha, jalla nii. Jazic anċhucqui walja ofrendanaca tjaaquiz niiqui, anċhuca okžni kuz tjeeznasacċha. ⁹Uċhum Jesucristo Jilirž ancha okžni kuz zizza anċhucqui. Jesucristuqui tjappacha nižtacama žejlċiž ċjenami, anċhucaž ċjen pori ċjissiċha tii muntuquiz kamcan. Jalla nuž pori ċjissiċha anċhuc ricachužtakaz ċjiskatzjapa.

¹⁰Jalla nižtiquiztan tii ofrenda puntuquiztan anċhucaquiz ċhižinuċha. Waj tsjii wataqui anċhucqui t'akjir criichinacžtajapa ofrenda uch pecatċha, nižaza ofrenda uchi kalltichinċhucċha. Jalla nižtiquiztan anziqii nii ofrenda cumpliskatz waquiziċha. Jalla niiqui walipanž ċjesaċha. ¹¹Tuquiqui anċhucqui tjapa kuztan ofrenda uch pecatċha. Jalla nuž pectaqui cumpliskatz waquiziċha, anċhuca želinchizquiztan jama. ¹²Jakziltat tjapa kuztan ofrenda utċhaja, želinchizquiztan jama uch waquiziċha. Jalla niiqui Yoozquin cuntintu ċjiskatasacċha. Jakziltat ana zinta želinchiz ċjeċhaja, jalla nižquiztan Yoozqui ana ofrenda mayċha. ¹³Wejrqui anal pecuċha, yekja criichinacžquiz yanaptiquiztanaqui anċhucpacha t'akjiri ċjisjapa. ¹⁴Tuž cjiwċha, anziqii anċhucqui juc'ant želinchizza. Jalla nižtiquiztan nii t'akjir criichi žoninacžquiz yanapasaċha. Wiruŋaqui ninacaqui anċhucaquiz yanapaċhani, ninacž juc'ant želinchizquiztan jama. Jalla nižtiquiztan tsjiikaz ċjequičha. ¹⁵Ćjijrta Yooz taku tuž ċjiċha: "Juc'ant želinchiz žoniqii anaž ċhjetnasacċha. Nižaza ana želinchiz žoniqii ana t'akjiri želasacċha".

TITŽ PUNTU

¹⁶Yoozqui Tito anċhucaquiz ancha ċjuŋzkachiċha, jaknužt wejrqui anċhucaquiz ċjuŋžniċha, jalla nižta. Jalla nižtiquiztan Yoozquin gracias ċjican ċhiyuċha. ¹⁷Weriž roctiquiztan Tituqui "iyaw" ċjiċhiċha. Pero niipacha anċhucaquiz ċjuŋziċha. Jalla nižtiquiztan persun kuzquiztan anċhucaquin tjonžcaquiċha. ¹⁸Titžtan juntu yekja jila cuhanžcaċha. Tjapa iclizziz criichinacaqui nii jilž puntu

zizza, zuma liwriiñi taku parliñi, jalla nii. ¹⁹Nižaza iclizziz criichinacacui nii jila utchičha, wejttan chica ojklajajo, nižaza tii ofrenda Jerusalequin chjitzjapa. Wejrqui tii ofrenda chjitz pecučha, Yooz honora waytizjapa, nižaza wejt yanapñi kuzziz tjeezjapa. ²⁰Jalla nuž tii ricujta ofrendacui ancha tažpachačha. Jalla nii paaznaca chjichcan wejrnacui zuma kjana kamz pecučha, žoñinaca wejtnacaquiz ana uj tjojtñajo, “Pabluqui persunjapa ofrendanacquiztan paaz jwessičha”, cjican. ²¹Yooz yujcquizimi žoñinacž yujcquizimi wejrnacui zuma lijituma kamz pecučha.

²²Titžtan nii yekja jilžtan tsjii jilžtan zakaz cuchanžcačha. Tii jilaqui wejrnacui wawczinčha, zuma lijitum kuzziz čhjultakquiztanami, jalla nii. Niiqui ančhuca puntuquiztan nonžcu, ančhucaquin tjonzquin ancha pecchičha. Ančhucaž zuma kamtiquiztan nižta kuzzizza. ²³Titž puntuquiztan tuž cjiwčha. Niiqui wejt cumpañeručha. Nižaza wejttan chica ančhucultajapa sirwičha. Nii yekja pucultan jilanacž puntuquiztan tuž cjiwčha, ninacačha iclizquiztan cuchantaquí, nižaza ninacaž cjen Cristuqui ancha honorchizza. ²⁴Nonžna ančhucui. Tjapa criichinacžquiz ančhuca zuma okžñi kuz tjeezna. Jalla nuž tjeeznan criichinacacui zizaquíčha, zuma razunžtan ančhucaž kamtiquiztan wejrqui cuntintutčha, jalla nii.

OFRENDA PUNTU

9 ¹Tsjiižtan zakal chiižinučha Yooz žoñinacžtajapa ofrenda puntuquiztan. Jalla nii puntuquiztan anačha ančhucaquin tsjii cartami cjiyržquichuca. ²Ančhucui tjapa kuztan tjaaz pequiñchucčha. Jalla nii

zizučha. Nižaza Macedonia yokquin žejlñi criichinacžquiz cuntintu cjiwčha, ewitanpacha Acaya yokquin žejlñi criichinacacui ofrendižtan yanapzjapa listutačha, jalla nuž chiyučha. Jalla nuž nonžcu tsjan kuzziz cjissičha ofrenda uchjapa zakaz. ³Nižaza wejrqui tii čhjepultan jilanaca cuchanžcučha, weriž chiita ančhuca puntuquiztan ana toscara cjisjapa, ultimupan ančhuca uchta ofrenda tjacžta cjisjapa, jaknužt wejrqui parti criichinacžquiz cjiutčhaja, jalla nuž. ⁴Cunamit yekjap Macedonia criichinacacui wejttan chica tjonačhani. Ninacžquiz ančhuca ofrenda uch puntuquiztan kjaž wiltami chiižinčinčha. Jalla nižtiquiztan ančhuca ofrenda ana listu tjacžtažlaj niiqui, wejtnacaltami ančhucaltami aziž cjequíčha. ⁵Ana azi cjisjapa, wejrqui tantiichinčha, tii čhjepultan jilanaca roc waquizičha wejt tuqui ančhucaquin tjonznajo. Ninacacui tjonžcu ančhucaž compromitta ofrenda cumpliskataquíčha. Jalla nižtiquiztan ančhuca ofrenda listu tjacžta cjequíčha ima wejt tjonan. Zuma okžñi kuzziz cjen ofrenda uch waquizičha, ana weriž chiižintiquiztanz.

⁶Ančhucui tii cjuñzna. Jequit koloculla zkala čhjacačhaja, nižaza koloculla ajznaquíčha. Nižaza jequit wacchi čhjacačhaja, nižaza wacchi ajznaquíčha. ⁷Zapa mayni persun kuzquiz tantižcu, ofrenda uchaquíčha. Jequit zuma okžñi kuztan ofrenda utčhaja, jalla niižtan munazičha Yoozqui. Ana pizc kuztan uhasačha, nižaza ana žoñiz chiižintiquiztanz uhasačha. ⁸Tiizakaz cjuñzna. Yoozqui ančhucaquiz wacchi tjpaman wintizunanaca tjaaznasačha. Jalla nižtiquiztan ančhucui želinchizkaz cjesačha. Nižaza ančhucui želinchizquiztan ofrenda tjaasačha,

tjapaman zuma obranaca yanapzjapa. ⁹Tii puntuquiztan cjiŕta Yooz takuqui tuž cjiča: Zuma žoñiqui okzñi kuztan pori žoñinacžquiz tjaača. Nižaza niiž zuma obranaca watay wata cjuñtaž cjequiča. ¹⁰Yoozza semilla tjaañiqui čhjaczjapa, nižaza čhjeri tjaañiqui lujljzjapa. Jalla nižtiquiztan Yoozqui ančhucacquiz želinchiz cjiskataquiča, juc'anti. Nekztan ančhucqui juc'ant ofrenda tjaasača. Ančhucaž zuma tjaatiquiztan zuma obranacchiz cjequiča. ¹¹Yoozqui ančhucacquiz tjapaman zuma cusasanacchiz cjiskataquiča, ančhuca okzñi kuztan juc'anti tjaaazjapa. Ančhucaž uchta ofrenda intirjitiqiztan, nii ofrendižtan yanapta criichinacacqui Yoozquin ancha gracias cjican cjequiča. ¹²Jalla nuž ofrenda tjaacan Yooz sirwiča. Nižaza nii Yooz sirwitiqiztan t'akjir criichinacacqui yanapta cjequiča. Nekztan ninacacqui Yoozquin ancha gracias cjican cjequiča. ¹³Tii ofrendaqui tjeeža, jaknužt ančhucqui Cristuž liwriiñi tawj jaru kamčhaja, jalla nii. Nižaza ančhucaž zuma kamtiqiztan Yoozquin ancha honorchiz cjequiča. Ančhucqui okzñi kuztan wali chawc ofrenda tjaaquiča. Ninacžtajapa, nižaza tjapa criichi žoñinacžtajapa ančhucqui zuma okzñi kuzzizčhucča. Jalla nižtiquiztan Yoozqui honorchiz cjequiča. ¹⁴Yoozqui ančhucacquiz ancha zuma okzñi kuzziz cjiskatchiča. Jalla nižtiquiztan nii yanapta žoñinacacqui ančhucaltajapa Yoozquiztan mayižinaquiča. Nižaza ančhucatan juc'anti zuma munazaquiča. ¹⁵Jilanaca, cullaquinaca. Tiipanž cjuñzna. Yoozqui učhumnacacquiz Cristo tjaachiča. Nii Yooziž tjaataqui juc'ant zumača; ana tintazzucača. Yoozquin ancha gracias cjican cjiwča.

PABLUQUI CRISTUŽ APOSTOLUČHA

10 ¹Jilanaca, cullaquinaca. Wejr Pabluqui tii cjiŕžcuča. Jazic nonžna. Cristuqui humilde kuzzizza. Jalla nižta kuzziz cjen wejrqui ančhucacquiz chiižinžcuča. Yekjap žoñinacacqui tuž cjiča: “Ančhucatan žejlcan, Pabluqui humilde kuzziztača. Pero ančhucatan ana žejlcan, c'aripachača”. ²Ančhucatan wilta žejlcan, ana wilta c'ari cjis pecuča. Yekjapanacacqui wejtnacacquiz uj tjojtunča. “Žoñž kuzcamakaz kamčha Pabluqui”, jalla nuž cjiñiča. Jalla ninacžtajapa c'ari cjesača. Pero ančhucqui ninacaž irata ana cjee. Ančhucaltajapaqui anal c'ari cjis pecuča. Cristuž apostoltča wejrqui. Pero wejt persun aztan mantiz anal tjeez pecuča. ³Wejrqui žoñi cjicanami ana žoñž kuzcamakaz paa-uča, nižaza ana žoñinacžtan kichas pecuča. Pero tjapa Yooz quintranacžtan quiražtakaz zalznasača. ⁴Nižaza Yooz quintranacžtan zalžcu, ultim arma anal joojoo-uča. Antiz Yooz aztan anawalinacqiztan atipasača, ninacaž anawal azziz cjenami. ⁵Yooz quintra razunanacami atipasača. Nižaza čhjul mit kuzquiztan pinsita razunanacami atipasača, žoñinaca Yoozquin pajkatzjapa. Tjapa žoñinacaž pinsitanacami Cristuž tjaajintanac jaru cjiskatz pecuča. ⁶Jalla nižtiquiztan wejrqui listuča tjapa Yooz quintra žoñinaca casticzjapa. Ančhucqui Yooz mantuquizpan cjisna, tjappacha. Weriž tjonztan, jakziltat anaž Yooz mantuquizlaja, jalla niiqui casticta cjequiča. Cristuž apostoltča wejrqui. ⁷Ančhucqui žoñikaz chekža, kjažta tsijtchižlaja nižaza kjažta chiiñižlaja, jalla nii. Jakziltat mit kuzziz “Wejrqui Cristuž partiquiztča”

cječhaja, jalla niiqui cjuñz waquizičha, wejrzakaztčha Cristuž partiquiz, jalla nii. ⁸Wejt apóstol puesto puntuquiztan cunamit juc'anti chiyučhani. Jalla nuž cjenami wejrqui anal azasačha. Jesucristo Jiliriqui wejtquiz nii apóstol puesto tjaachičha, ančhucalta zuma kamañchiz cjiskatzjapa. Wejtta nii poder ana žejlčha, ančhuc akzjapa. ⁹Cartanaca cjiřzcu anal ančhuc tsucunz pecučha. ¹⁰Yekjap quintru žoñinacaqui tuž cjičha: “Pabluž cartanacaqui chawjc jilirž cartanacažtakazza. Pero tekz žejlcan, ana azzizza, nižaza niiž razunanaca inakazza”. Nuž cjiñičha yekjapanacaqui. ¹¹Jalla nižta cjiñi žoñinacaqui zumpacha intintaz waquizičha. Jaknužt wejrqui cartanacquiz cjiřžquitučhaja, jalla niicama paasačha ančhucatan žejlcan.

¹²Nii mita kuzziz žoñinacaž irata cjis anal pecučha. Ninacaqui porapat iñarascan ana intintazñi kuz tjeeža. Yooz tawk jarupankaz kamz waquizičha. ¹³Wejrqui persun puntuquiztan anal juc'ant chiyučha. Yoozpachačha wejtquiz tii apóstol langz tjaachiqui. Nii langzquiztan jama chiyučha. Nižaza nii Yooziž tjaata langzquiztan jama ančhucaquin tjonzinčha, liwriñi Yooz taku paljayzjapa. ¹⁴Ančhucaquin ana tjontasaž niiqui, wejrqui Yooziž tjaata langzquiztan jama ana ojktasačha. Parti Cristuž liwriñi taku paljayñi žoñinacžquiztan wejrtčha primero ančhucaquin tjonchintqui. Yekja žoñiž Yooz taku langtiquiz ana mitisasačha. ¹⁵Yekja žoñiž Yooztajapa langztiquiztan anapal cjiwčha, “Nii langztaqui weriž langztačha” cjicanaqui. Wejrqui pecučha, ančhucui juc'anti Yoozquin kuzziz cjejajo. Jalla nižtiquiztan

ančhucaporquiz Yooztajapa juc'anti langz pecučha, Yooz tjaata langzquiztan jama. ¹⁶Jalla nekztanaqui ančhucaquiztan nawjkchuc yekja wajtchiz žoñinacžquiz zakaz liwriñi Yooz taku paljayz pecučha. Pero yekja žoñiž Yooztajapa langztiquiz anal mitisis pecučha.

¹⁷Jakziltat honora waytiz pecčhaja, nižlaqui Yooz honora waytiz waquizičha. ¹⁸Jakziltat persun honora waytican chiiñižlaja, jalla niž puntuquiztan Yoozqui “ana zumačha” cjequičha. Jakziltat “Yooz alaja zumapankazza” cječhaja, jalla niiqui Yooziž tjaata honorchiz cjequičha.

PABLUŽTAN ANAZUM TJAAJININACŽTAN

11 ¹Wejrqui zumzužtakaz tsjii koluc chiyačha. Nii zumzužtakaz chiita takunaca nonžnalla. ²Yoozqui ančhucajapa tsjii silusiñižtakaz wejtquiz cjiskatčha. Weriž Yooz taku paljaytiquiztan ančhucui Cristužquin kuzziz cjissičha. Cristužtan zalz ora wejrqui ančhuc zuma kamañchiz Cristužquin prisintis pecučha, jaknužt tsjaa zuma tur naaža compromitta tjowžquiz prisintita cječhaja, jalla nuž. ³Wejrqui ančhuca puntuquiztan turwayznučha; cunamit tsjiiqui ančhucaquiz incallskatačhani, Cristužquin ana tjapa kuz cjisjapani, nižaza Cristužquiztan zarakchi cjisjapani. Ančhucaž pinsitanacaqui tsjii kjutñiž cjisnačhani. Tuquitanpacha nii ana wal zkoraztakaz diablui mañužtan Evaquiz incallchičha, cunamit jalla nižta incallta cjisnačhani ančhucui. ⁴Wejrqui ančhucaquin tjonchinčha, werar liwriñi takumi nižaza Jesusiž puntuquiztanami paljayzjapa, nižaza tjonchinčha Espřitu Santuž ančhuca kuzquiz

luzskatzjapa. Jaziqui ančhucquiz chiižinuča. Tsjii žoñinacaqui tsjemat liwriiñi taku paljayñiž cjenami, ančhucqui nii incallñi žoñi zuma risiwiñčhucquiča. Ninacaž tsjemat tjaajintanaca catokiñčhucquiča. Nižaza tsjii žoñinacaqui tsjemat espiritunaca tjaaz pecasaž niiqui, ančhucqui nižta incallñi žoñi zuma risiwiñčhucquiča. Nuž nonžcu, ispantichinča; nižaza llaquita kuzziz cjiskatchinča. ⁵Yekjapnacaqui ančhucaquiztan nii incallñi žoñinacž puntuquiztan pinsiča, zuma apostolonacača, jalla nii. Ninacaqui anača werar apostolonacaqui; anača wejtquiztan pajk jiliriui. Jalla nuž cjiwča. ⁶Wejrqui anal altu tawkžtan paljaycan ančhucatan kamchinča. Jalla nuž cjenami wejrqui Yooz puntu zuma zizuča. Jalla nii zizñi cjican kjanapacha tjeezinča weriž tjapa puntunaca paljaytiquiztan. Tantiya ančhucqui.

⁷Wejrqui humilde kuzziz ančhucatan kamchinča, ančhuc honorchiz cjisjapa. Nižaza ana paaz paca mayžcu, liwriiñi Yooz taku ančhucaquiz paljaychinča. ¿Jalla nuž anawali paachin wejrjo?

⁸Yekja iclizziz žoñinacaqui wejtquiz paaz tjaachiča. Jalla nii ofrendanaca tanzinča, ančhucaquin Yooz taku paljayñi ojkszjapa. ⁹Ančhucatan kamcan ana želinchiz cjiissinča. Pero ančhucaquiztan ana čjulumi maychinča. Macedoniaquiztan tjonchi jilanacaqui wejtquiz onanchiča. Jalla nižtiquiztan anaž čjulumi wejtquiz pjaltatča. Tuquiqui wejrqui ančhucaquiz ana mayzjapa anča cwitassinča, ančhucjapa ana ch'ama cjeajajo, nižaza jaztanami mayzquiztan cwtasuča. ¹⁰Jaknužt Cristuqui werarapan chiiñitažlaja, jalla niiž cjen nižta werarapan chiyiñzakaztča

wejrqui. Jalla nižtiquiztan legali cjican, wejrqui cjiwča, anaž jec Acay wajtchiz žoñiqui wejt puntuquiztan cjesača, “Pabluqui ana želinchiz cjican, wejtquiztan maychiča”, nuž cjicanaqui. Jalla nuž ančhucaquiztan ana čjulumi maytiquiztan cuntintutča wejrqui. ¹¹¿Kjažtiquiztan nižta chiyu wejrjo? ¿Ančhucatan ana zuma munazojo? Anapanž cjesača. Yooz zizza, wejrqui ančhucatan munazuča, jalla nii. ¹²Wejrqui liwriiñi Yooz taku paljayiñča, ana paaz paca mayžcuqui. Nižaza tirapan nužullakaz kamača. Nekztan jakziltat paaz ganzjapa Yooz taku paljayčhaja, jalla niiqui anapanž cjichuca, “Wejrtča Pabluž irata Yooz taku paljayiñtqui”, nuž cjicanaqui. ¹³Nii paaz tanzjapa paljayñinacaqui falso apostolonacača. Nii žoñi incallñinacaqui Cristuž apostolonacažtakaz ojklayñiča.

¹⁴Jalla nužupan tii muntuquiz wataquiča. Satanás diablupacha tsjii Yooz anjilažtakaz ojklayča. ¹⁵Nižazakaz Satanásquiz sirwiñi žoñinacaqui werara Yooz sirwiñinacažtakaz ojklayča. Jalla nižta puntu nayžcu, ana tsucaquiča. Ninacaž nižta ojklaytiquiztan jama castictaž cjequiča.

PABLUQUI ANCHA SUFRI SNACA WATCHIČHA

¹⁶Wital cjiwča. Jalla nuž chiyanacqui ančhucqui weriž chiita puntuquiztan anača pinsisqui, “Niiqui zumzu taku chiiča” cjicanaqui. Jalla nuž pinsanami, wejr chiyaj cjila tsjii lucrata žoñižtakaz. Wejrqui tsjii locuculla persun honora waytaj cjila. ¹⁷Jalla nuž chiican wejrqui lucrata žoñižtakaz chiyacha. Anal chiyacha Yooz Jilirž ortin jaru,

jalla nuž persuna honora waytican.

¹⁸Walja žoñinacaqui tii muntuquiz čhjulunacquitzanami persun honora waytičha. Jalla nižtiquiztan wejr zakal persun honora koluculla waytačha.

¹⁹Ančhucqui chiiñčhucčha, “Ziziñ žoñinactčha wejrnacqui”, cjicanaqui. Jalla nuž chiichiž cjenami ančhucqui zumzu žoñinacž takunaca cuntintu nonzninčhucčha. ²⁰Falso žoñinacaqui ninacž mantuquiz ančhuc cjiskatz pecčha. Nekztan ančhucqui nii žoñinacžquiz zuma cassa. Nižaza tsjii falso žoñinacaqui ančhuca cusananacquitzan paca mayčha. Nekztan ančhucqui ninacžquiz zuma tjaačha. Nižaza tsjii falso žoñinacaqui persunaltajapa zuma cjisjapa ančhuc mantičha. Nekztan ančhucqui niizquiz zuma cassa. Nižaza tsjii falso žoñiqui ančhuc iñarčha. Nekztan ančhucqui niizquiz zumakaz awantičha. Nižaza tsjii falso žoñiqui ančhuca yujcquiz tsjajpačhani. Jalla niizakaz ančhucqui zuma awantačhani.

²¹Wejrqui ančhucatan kamcan ana nižta kamchinčha; humilde kuzziz kamchinčha. ¿Jalla nižtiquiztan wejrqui azasajo? Anapal azasačha. Yekja žoñinacaqui čhjulquiztan persun honora waytačhaja, jalla nii žoñinacžquiztan juc'antitčha wejrqui. Jalla nuž chiicanaqui lucuratažtakaz chiyučha. ²²Yekjapanacaqui cjiñičha, “Hebreo sarchiz žoñinactčha wejrnacqui”. Werj zakal cjeečha, “Hebreo sarchiz zoñtčha wejrqui”. Nižaza ninacaqui cjiñičha, “Yooz illzta Israel wajtchiz žoñinactčha wejrnacqui”. Wejr zakal cjeečha, “Yooz illzta Israel wajtchiz zoñtčha wejrqui”. Nižaza ninacaqui cjiñičha, “Abrahamž majchmaatquiztan tjoniñčha”. Wejrmi zakal cjeečha, “Abrahamž majchmaatquiztan tjoniñčha”.

²³Ninacaqui cjiñičha, “Cristuž sirwiñtčha”. Wejrmi zakal cjeečha, “Cristuž juc'ant zuma sirwiñtčha”.

Jalla nuž chiicanaqui lucuratažtakaz chiyučha. Pero ninacžquiztan juc'anti langzinčha Cristužtajapa. Nižaza ninacžquiztan juc'anti wjajttatačha. Nižaza ninacžquiztan juc'anti carsilquiz chawctatačha. Nižaza tsjii kjaž wilta ticzmaya želaytučha.

²⁴Pjjska wilta judío žoñinacaqui wejr casticchičha. Jalla nuž casticcan, quinsa tunca llatuncan lazú wjajtta mutchinčha. ²⁵Čhjep wilta wejrqui wjajtz paržtan wjajttatačha. Tsjii wilta maztan čhajctatačha. Čhjep wilta warcuquiz okan nii warcu julskatchičha. Warcu julskatzcu tsjii nooj weentižtan majiñtižtan pajk kot taypiqueiz žejlchinčha. ²⁶Tirapan ojkojkchinčha, walja anawalinaca watñiž cjenami. Tižta anawalinaca watchinčha, anawal pujunaca, anawal tjañinaca, wejt wajtchiz anawal žoñinaca, yekja wajtchiz anawal žoñinaca, chawjc wajtquiz anawal žejlñinaca, ch'ekti yokquin anawal žejlñinaca, anawal pajk kotanaca, nižaza anawal falso jilanaca. Jalla nižta anawalinacami watchinčha.

²⁷Nižaza ancha langzinčha, nižaza zuma ch'amanaca watchinčha, kjaž wilta ana tjaji atchinčha, nižaza kjaž wilta čherž kjarami kjaz kjarami passinčha, kjaž wilta ayunassinčha. Nižaza kjaž wilta zakinacquiz ch'uncan sufrichinčha, zquitž kjara. ²⁸Tjapa nižtanaca watchiž cjenami, iyakal sufručha. Zapuru tjapa iclizziz žoñinacžtajapakal cjuñznučha, llaquita kuzziz ninaca zuma kamañchiz cjiscama. ²⁹Jakziltat lajllasñi kuzziz cječhaja, wejrqui nižtan chica zakal llaquisučha. Jakziltat ujquiz tjojtskatñi cječhaja, wejrqui nii tjojtskatñi

žoňž quintrá žawjznuča. ³⁰Wejrqui persun honora waytaž niiqui, weriž sufritanacquiztanami nižaza inallakaz cjitiquiztanami honorál waytača.

³¹Anal toscara chiyuča. Jesucristo Jilirž Yooz Ejppui nii zizza. Yooz Ejppui wiňaya honorchiz cjila. ³²Damasco wajtquin želan, Aretas cjita chawjc mantiňi jiliriqui ulanz zananacquin guardianaca mantichiča, wejr tanzjapa. ³³Pero criichi jilanacaqui wejr pajk canastiquiz yaažcu, pirkiz tsewctan kozzuc tsjii kjuya wintanquiztan wejr chjijunchiča. Jalla nižtiquiztan wejrqui ninacžquiztan atipassinča.

12 ¹Persun honora waytican, anača čhjulumi wejttaqui cusaqui. Jalla nuž cjenami tiral wejt puntuquiztan chiyuča. Ančhucaquiz tii zakal quint'ača, Yoozqui niž puntunaca cherkatchiča. Nižaza niž puntunaca zizkatchiča.

²Wejrqui Jesucristužquin kuz tjaachinča. Niiž wiruň ažk tunca pusin watanaca wejrqui arajpach Yooz wajtquin chjichtatača tsjii upacama. Curpužtanpacha chjichtatažlaja, už ana curpužtanpacha chjichtatažlaja, jalla nii anal naychinča. Yooz Ejpkaz zizza. ³⁻⁴Pero wejrqui zizuča, nii zuma wajtquin chjichtatača, jalla nii. Curpužtanami ana curpužtanami, jalla nii anal naychinča. Yoozkaz zizza. Jalla nii zuma wajtquin takunaca nonzinča, jalla nii nonžta takunacaqui anača chiichuca žoňž takunacžtan. ⁵Jalla nii Yooz puntu nonztiquiztanami chertiquiztanami honora waytasacha. Wejrqui persun sufrisnacquiztan honora zakaz waytasacha. Persunquiztan anal honora waytiz pecuča. ⁶Wejrqui persun honora waytiz pectasaž niiqui lucuratažtakaz ana chiitasacha. Zuma

werar razunžtanpan chiyuča. Jalla nuž cjenami, persun honora anal iya waytača. Weriž chiitanacquiztanami paatanacquiztanami jalla nii jarukaz wejrqui rispitta cjesača. ⁷Nii Yooz puntu ziztanaca, chertanaca juc'ant zuma cuzača. Jalla nižtiquiztan ana mit kuzziz cjisjapa, Yoozqui wejr laa cjiskatchiča. Wejr tsjii ch'apžtan chjapchižtakaz sufriskatchiča. Yoozqui Satanás diablūžquiz nii laa cjisjapa permitchiča, wejtquiz nižta sufriskatzjapa. ⁸Wejrqui čhjep wilta nii laa puntuquiztan Yooz Jiliržquin mayzichinča, wejt curpu laa žetajo. ⁹Pero Yooz Ejpzi wejtquiz kjaaziča, tuž cjican: Wejrqui amtan zuma munazuča, jalla nižtiquiztan amquiz yanapača. Am inallakaz cjicanaqui wejt aztan amquiz zuma atňi cjiskatača, nižaza čhjulunacquiztanami amquiz zuma atipňi cjiskatača. Jalla nuž cjichiča Yoozqui.

Jalla nižtiquiztan wejrqui sufrisnaca watchiž cjenami, nižaza inallakaz cjenami, cuntintul cjeeča. Nekztan Cristuž aztan wejt kuzmi curpumi yanaptaž cjequiča. ¹⁰Cristužtajapa sufricanaqui čhju watanami cuntintul cjeeča, inallakaz cjenami, iňarta cjenami, ana želinchiz cjenami, sufriskatta cjenami, ch'amanaca watchiž cjenami, čhjulunacaž watanami cuntintul cjeeča. Juc'ant inallakaz cjicanaqui, juc'ant tjupi kuzziztča, Cristuž aztanauqi.

¹¹Jalla nuž chiican lucuratažtakaz chiichinča. Ančhucpachaž nižta wejr chiikatchiča. Ančhucpacha wejt puntuquiztan zumanaca chiiz waquziča. Yekjap žoňinacaqui chiiňiča, nii Pablužquiztan juc'ant zuma apostolonactča wejrnacqui, cjican. Jalla nižta cjiňinacžquiztan

juc'ant zumt'cha wejrqui, Yooz yujcquiz inakaz cjenami. ¹²Wejrqui an'chucatan žejlcan ultim werar apóstol puestuquiz ojklaychin'cha, zuma pasinsis kuztan. An'chucporquiz wacchi milajrunacami, siñalanacami, ispantichucanacami, jalla nižtanaca paachin'cha. ¹³Jaknužt parti iclizziz criichinacžtan kamtučhaja, jalla nižta irata an'chucatan kamchin'cha. Jalla nuž kamcan an'chucaquiztan ana čhjulumi maychin'cha, jaknužt parti criichinacžquiztan maytučhaja, jalla nižta. Jalla nii ana čhjulumi maytiquiztanacui cunamiž an'chucqui žawjčhani. Jalla nektzanž pertunalla.

PABLUQUI CORINTO ŽOÑINACŽQUIZ ANCHA CJUŇCHA

¹⁴Anziqui wejrqui tjacznučha čhjep wiltiquiziqui an'chucaquin tjonzjapa. Tii wilta zakaz an'chucaquiztan ana čhjulumi mayačha. An'chuca cusasa wejtquiz anaž importi'cha. Antiz an'chuc alaja importayu'cha. Ocjalanacaqui anaž cusasanaca juntasačha, maa ejpžtaqui. Antiz maa ejpnacaž cusasanaca juntasačha, persun ocjalanacžta. ¹⁵Jalla nižtiquiztan wejrqui persun gasto gastačha an'chuca kuznaca zuma cjisjapa. Wejrqui an'chucaquiz yanapasačha ochañcama. Wejrqui an'chucatan juc'ant zuma munaziñi kuzzizt'cha. ¿An'chuczti upa wejttan munaziñi kuzzizčhuckaya?

¹⁶Tsjii žoñinacaqui tuž cjiñi'cha, Pabluqui wejtnacaquiztan ana čhulu may cjenami, jalla nuž maña paacan wejtnacaquiz incallchi'cha. Jalla nuž cjiñi'cha. ¹⁷Pero wejrqui pewcznučha, ¿Wejrqui cuchanžquita jilanacžquiz an'chuc incallzkatchinjo? Anapan'cha. ¹⁸Wejrqui Tito rocchin'cha an'chucaquiz tjonzcajo. Niižtan chica yekja jila

cuchanžquichin'cha. ¿Nii Titžquiz an'chucqui incallchin'chucjo? Niižtan wejttan nuž pucultan an'chucatan zumpacha kamchin'cha, zuma kuztanami nižaza zuma kamcanami.

¹⁹An'chucqui cunamit wejt puntuquiztan pinsi'chani, Pabluqui persun puntuquiztan tirapankaz tjurt'i'cha, jalla nii. Jalla nižta pinsitaqui anazumačha. Weriz pecta jilanaca, cullaquinaca. Yooz yujcquiz Cristuž tjuuquiz chiyu'cha, an'chuca kuznaca juc'ant zuma cjisjapa. ²⁰An'chucaquin tjonžcu, cunamit wejrqui an'chucaquiztan tsjii žoñinacžtan anazuma kamañchiz zalačhani. Jalla nii jiwjatu'cha. Jalla nižta zalaž niiqui, wejrqui an'chucaquiz c'aril cjee'cha. Jalla nižta c'ari takunacžtan tjonzjapa anaž pec'cha an'chucqui. Cunamit an'chucaporquiz ch'aaznaca žejlčhani, nižaza inžiziñinaca žejlčhani, nižaza čhjaawjkatñinaca žejlčhani, nižaza mitarar kuzziznaca žejlčhani, nižaza ana zum taku joojooñinaca žejlčhani, nižaza žoñž quintra chiichiñinaca žejlčhani, nižaza mit kuzziz žoñinaca žejlčhani, nižaza kichjasñi kuzziz žoñinaca žejlčhani. Jalla nižtanaca žejlčhani. Jalla nižtiquiztan tii cartal cijjržcu'cha, an'chucaž ana zuma kamañanacquiztan jaytisjapa. ²¹Cunamit yekjapanacaqui ana zuma kamañchizlani, nižaza adulteriuquiz ojklaychižlani, nižaza ana walinaca paachižlani. Cunamit yekjapanacaqui an'chucaquiztan uj paayin'chucžlani, nižaza an'chuca ujquiztan ana pertuna mayizichin'chucžlani. Jalla nižtiquiztan an'chucaquin tjontan cunamit wejt Yoozqui an'chucaž anazuma kamchiž cjen wejr azkatačhani. Nižta wataquiz niiqui, llaquita kuzziz cjee'cha.

ŽERZ TAKUNACA

13 ¹Tiižtan čhjepquiziqui an'chucaquin tjonžcu'cha. Ima

tjoncan tiizakal chiižinuča. Tsjii žoñžquiz uj tjojtnaquiz niiqui, ima casticta cjan, pucultan čjepultan tisticunacžtan ticlarskataquičha nii uj paañi žoñž puntuquiztan. ²Tuquiqui wejrqui uj paañi žoñnacžquiz chiižinchinča, ujnaca eca, cjan. Nižaza tjapa žoñnacžquizimi nižta chiižinchinča. Jaknužt pizc wiltiquiz tjonžcu ninacžquiz chiižinchinča, jalla nižta tii cartiquiz wilta chiižinžcuča, ančhucatan ana žejlcanami. Wilta tjonžcu, uj paañi žoñnaca panž casticača. ³Jalla nuž castictiquiztan ančhucqui kjanapacha cheraquičha, Cristužtan wejttan tsjii kuzzizza. Jaziqui Cristuqui wejr chiikatchičha. Cristuqui anača inallakaz ančhucaltajapa. Antiz ančhucaporquiz niiž azi tjeeža. ⁴Ina žoñižtakaz cruzquiz ch'awctatača. Pero Yooz Ejpž aztan jacatatchičha. Cristužtakaz inallakaz wejrqui. Pero nižaza Cristužtan kamcan, wejrqui Yooz aztan tjeznasača ančhucaltajapa.

⁵Ančhucqui persunpacha kuz tantiyasa, Cristužquin tira kuz tjurt'iñi, už ana tjurt'iñi, jalla nii. Persunpacha tantiyasa. Jesucristuqui ančuca kuznacquizza. ¿Jalla nii ana naazjo? ¿Ančhucqui anaj ultim criichinacajo? ⁶Wejrqui cjiwča, wejrnacqui anača falso criichi žoñi, antiz ultim werar criiñ žoñtča. ¿Nii ana nayjo? ⁷Wejrqui Yoozquin mayizuča, ančhuc ana ujnaca paajo. Jalla nuž mayizuča, wejt zuma razuna ana tjeezjapa, antiz

ančhucqui zuma cjisjapa. Wejrqui ana zuma razunchižtakal cjež niiqui, anaž importičha. ⁸Wejrqui werar razun quintrā anal paasača čhjulumi. Antiz werar razun jarukaz chiyasača. ⁹Jalla nižtiquiztan wejrqui inallakaz cjanami cuntintučha, ančhucqui tjup kuzziz cjequiz niiqui. Wejrqui ančhucaltajapa tira Yoozquin mayizuča, ančhuc juc'ant zuma kamañchiz cjisjapa. ¹⁰Wejrqui ančhucatan ana žejlcan, jalla tuž tii cartal cjižrcučha, ančhuc zuma cjisjapa. Wejrqui ančucaquin tjonača Yooz Jilirž apóstolž aztan. Ančucaquin tjonača, ana c'aripacha cjisjapa, antiz ančhuc juc'ant zuma kamañchiz cjiskatzjapa.

¹¹Jilanaca, cullaquinaca, jalla nuž chiižcu tiizakal chiyučha. Ančucaquiz zumaj cjila. Ančuca kamañanaca zumpacha azquicha. Zuma kamañchiz panž cjisna. Nižaza ančhucqui porapat kuzzasñiž cjee. Tsjii kuzziz cjee. Porapat zuma munaza. Jalla nuž zuma kaman, Yoozqui ančhucatan cjila. Yoozqui ancha zuma okžñi kuzzizza, nižaza niiča llan kuzziz cjiskatñiqui. ¹²Jilanaca, cullaquinaca, porapat zuma tsaanasaquičha. ¹³Tekzta tjapa Yoozquin kuzziz jilanacaqui ančucaquin tsaanžquičha.

¹⁴Jesucristo Jiliriqui tjapa ančucaquiz zumanacaj tjaala, nižaza Yooz Ejpqui tjapa ančhucatan zuma munaziñej cjila, nižaza Yooz Espíritu Santuqui tjapa ančuca kuznacquiz cjila. Jalla nužoj cjila. Amen.